

NEWSLETTER




FONDACIJA
HASTOR

august 2021.



NOVOSTI



Mjesečni sastanak stipendista

Time Management

Online sastanak studenata stipendista održan 20. augusta 2021. godine imao je posebnu važnost jer je stipendistica Amra Pušina spremila zanimljivo predavanje o Time Managementu koji je naročito bitan danas u užurbanom 21. vijeku kada je dobra organizacija vremena jedan od najvažnijih elemenata za uspješno i produktivno ispunjavanje obaveza i postizanje zadatih ciljeva.

Direktor Fondacije Hastor Seid Fijuljanin započeo je augustovski sastanak studenata stipendista kratkim obraćanjem o vrijednostima koje njeguje Fondacija. Direktor je naveo da svaki stipendista treba da se podsjeti osnovnih načela i ciljeva koje posjeduje Fondacija Hastor te da svaki stipendista mora imati u sebi osjećaj za pomaganje drugima. Upravo je pomaganje drugima kroz volontiranje jedna od osnovnih karakteristika Fondacije Hastor jer volontiranjem stipendisti doprinose svojim lokalnim zajednicama, a u isto vrijeme spoznaju važnost pružanja pomoći drugima.

Pored ovih beneficija direktor je naglasio da stipendisti Fondacije Hastor stvaraju prijateljstva za cijeli život koja se ne završavaju sticanjem diplome, nego se nastavljaju u okviru Alumni kluba bivših stipendista. Na ovaj način stipendisti ostaju dio naše velike porodice i nakon formalnog okončanja njihovog stipendiranja.

NOVOSTI



Direktor Fondacije je u nastavku prepustio sastanak stipendistici Amri Pušini koja je studentima stipendistima predstavila temu „Time Management“ što predstavlja sposobnost planiranja, određivanja radnih prioriteta i učinkovitog rada.

Odmah na početku predavanja Amra je ostavila stipendistima mogućnost da oni sami daju svoju definiciju koju je ona nakon toga dopunila i objedinila. Amra je uz zanimljive izreke i citate pokušala stipendistima što više približiti važnost dobre organizacije vremena čiji se značaj oslikava na naš cjelokupni život. Zaključili smo da dobro upravljanje vremenom povećava radnu učinkovitost, doprinosi ostvarivanju ciljeva, redukciji stresa i stvara ravnotežu u životu.

Čak i ako dobro organizujemo vrijeme, nekada mnogi drugi faktori mogu da nam poremete zadate planove i ciljeve. Stipendisti su razgovarali o svojim poteškoćama s kojima se susreću svakodnevno i nabrojali su svoje „kradljivce vremena“. Amra je navela još mnogo elemenata ili situacija koji nas mogu sprječiti u dobroj organizaciji vremena i obaveza, a svi smo se složili da su društvene mreže jedan od najzastupljenijih kradljivaca vremena. Zaključili smo da je za povećanje radne učinkovitosti od presudne važnosti pronaći svoje kradljivce vremena i eliminisati ih. U nastavku je Amra zadala zadatke stipendistima vezano za određivanje prioriteta ispunjavanja određenih obaveza, nakon čega su se stipendisti javljali s odgovorima ili svojim nedoumicama. Amra je dodatno obrazložila i druge važne stvari o ovoj temi te dala prijedloge kako na najbolji način iskoristiti slobodno vrijeme.

Kroz predavanje na ovomjesečnom sastanku studenti su bolje shvatili važnost dobre organizacije vremena i vjerujemo da je svaki stipendista pronašao neki dodatni savjet koji će mu pomoći u produktivnijem organizovanju njegovih obaveza u zadatom vremenskom periodu.

Bernand Borush kaže: „*Čovjek koji može upravljati svojim vremenom može upravljati gotovo sveime*“ i sa time se možemo gotovo svi složiti. Radujemo se sljedećem mjesecnom sastanku studenata stipendista do kojeg će studenti stipendisti još bolje naučiti upravljati vremenom.



STIPENDISTICA MJESECA



Fondacija Hastor može se pohvaliti marljivim, ambicioznim i uspješnim stipendistima koji ostvaruju zapažene rezultate na polju obrazovanja i nauke. Dakle, tim Fondacije čine mladi ljudi koji doprinose njenom radu, unapređujući ga svojim znanjem i vještinama. Upravo takve vrijednosti i predanost volonterskom angažmanu u okviru Fondacije Hastor iz mjeseca u mjesec stipendistima donose titulu stipendiste mjeseca. U nastavku čitajte o stipendistici koja je tu titulu odnijela ovaj mjesec!

Svakog mjeseca nas obraduju pozitivne priče naših stipendista. Lijepo je znati da ne-gdje pored nas žive ljudi koji neumorno rade na ostvarenju svojih snova. Njihove uspjehe vrijedi istaknuti kako bi njihov trud bio prepoznat od strane javnosti, ali i da bi se drugi okoristili i iz njihovih primjera crpili svoju motivaciju za rad.



Amina Okanović

Stipendistica mjeseca

Amina Okanović ima 21 godinu i dolazi iz Zenice. U rodnom gradu je odrasla i završila Osnovnu školu „Meša Selimović“. Po završetku osnovne škole našla se na prvoj životnoj raskrsnici – koju srednju školu upisati? Nakon dugotrajnog razmišljanja upisala je Drugu gimnaziju u Zenici, a kasnije će se ispustaviti da je to najbolja odluka koju je mogla donijeti. Upravo u srednjoj školi od razrednice je saznala za Fondaciju Hastor. Nakon časa je obavila razgovor s roditeljima i odlučila poslati pismo našoj Fondaciji. Odgovor je brzo uslijedio i već od naredne školske godine je postala stipendistica i članica naše divne porodice. Baš tu počinje inspirativna priča koja traje nešto više od 5 godina.

Volonterska druženja s mentorima je nešto čega će se Amina uvijek s osmijehom sjećati. Tokom srednjoškolskog obrazovanja bila je član, a kasnije i kapiten sekcije pružanja prve pomoći koja je ostvarila zapažene rezultate kako na gradskom tako i na kantonalm, ali i na federalnom takmičenju. Upravo na ovim takmičenjima je osvojila mnoga priznanja. Bila je članica i drugih vannastavnih aktivnosti, ali je uvi-jek željela da pomaže prije svega drugovima kojima je pomoć potrebna jer su je tim vrijednostima učili tadašnji mentori koji su ujedno i lajtmotiv Fondacije. Shodno tome Amina je nastojala da promjena krene od nje. U 2019. godini je postala dobrovoljni davalac krvi. Nakon završetka srednje škole postala je studentica softverskog inženjerstva na Politehničkom fakultetu Univerziteta u Zenici. Ono što je posebno raduje je činjenica da je upravo tu upoznala predivnu kolegicu koja je također dio Fondacije Hastor.

STIPENDISTICA MJESECA

Na drugoj godini, u sklopu predmetnog zadatka, s kolegama je radila na projektu pod nazivom „NVO Cloud“. Pored svih obaveza uspjeli su ostvariti najbolji mogući rezultat o kojem su, osim profesora na fakultetu, upoznati i zaposleni u Ministarstvu pravosuđa Zeničko-dobojskog kantona.

Naravno da je obrazovanje ključ uspjeha, stoga nastojim da na svakom volonterskom druženju ukažem na značaj, ali i beneficije koje nam obrazovanje donosi. Moram priznati da me upravo ta volonterska druženja posebno čine radosnom. Gledati kako mladi ljudi odrastaju u perspektivne osobe i na određeni način biti uključen u taj proces nevjerovatan je osjećaj i ne postoji način da se opiše.



Priča o volontiranju je manjkava ukoliko se ne spomenu Aminine kolege koje su joj u mnogome pomogle. Volonterski sastanci u društvenom centru, izrada akademskih kapa, časovi gitare samo su neke od radionica koje je ovaj tim pripremao za najmlađe. Pored ovoga organizovali su i jedan izlet u mjesecu januaru.

Kroz proteklih 5 godina, koliko sam zapravo stipendista, Fondacija Hastor je ostavila jedan nemjerljivi pečat u mom životu. Upravo sam kroz volonterski angažman dobila priliku da saradujem i družim se s divnim ljudima. Moram priznati da se Fondacija Hastor pojavila u mom životu kada je zaista bilo najteže i dala mi nadu u bolje sutra. Pored finansijske pomoći mislim da je bitno spomenuti i moralnu podršku naše Fondacije. Znati da se u svakom trenutku možete nekome obratiti i razgovarati, tražiti savjet je nešto što je zaista neprocjenjivo. Nešto u šta je teško povjerovati dok to ne doživite, dok ne postanete dio jedne velike zajednice. Upravo vas sve ovo motivira da svakog dana radite na sebi i da budete što bolji te da na taj način doprinesete samom radu Fondacije.



Što se tiče budućnosti, Aminin primarni cilj je završetak obrazovanja, kako bachelor studija tako i master-studija kao i usavršavanje, ali i učenje novih znanja i vještina. Za kraj je istaknula da inspiraciju i motiv pronađa u motu naše Fondacije koji glasi: „Da bi uspjeli, želja za uspjehom mora biti veća od vašeg straha od neuspjeha“. Ukoliko ostavimo svoje strahove duboko ispod ambicija, i mi ćemo kao i Amina postići velike stvari.

RAM - RUBRIKA AKTIVNIH MLADIH



RAM je, prema definiciji, radna memorija računara. U Bosni i Hercegovini, „radna memorija“ su upravo proaktivni i marljivi mladi ljudi koji su svojim djelovanjem primjer društva koje naša država treba. Kroz ovu rubriku predstaviti ćemo aktivne mlađe stipendiste Fondacije Hastor koji, pored volontiranja, rade fenomenalne stvari i tako predstavljaju Fondaciju u najboljem svjetlu!



Berun Agić


RAM stipendista mjeseca

Berun Agić iz Jajca je student prve godine Fakulteta informacijskih tehnologija Univerziteta „Džemal Bijedić“ u Mostaru i stipendista je Fondacije Hastor još od 8. razreda osnovne škole.

Humanitarni rad ističe kao volontersku aktivnost koja je odredila njegov put ka činjenju dobrog. Od institucija u kojima volontira navodi Crveni križ Jajce, Merhamet Jajce u sklopu kojeg je i javna kuhinja, Centar za druženje i obrazovanje mlađih gdje djeluje i dječji vrtić "Ciciban" te Udruženje za djecu sa poteškoćama u razvoju "Vodopad Ljubavi".

Od svih nabrojanih lokacija najviše vremena provodim i najaktivniji sam u Merhametu, odnosno Javnoj kuhinji Jajce i u Crvenom križu. U Merhametu, kao i u Crveni križ upisao sam se kao volonter odmah nakon upisa na fakultet jer sam znao da će mi u sklopu stipendije biti potrebno mjesto na kojem ću obavljati svoje volonterske dužnosti, a ta dva mjesta su bila ona koja bi po mojoj procjeni najviše pomogla i doprinijela poboljšanju života ljudi iz moje okoline. Moj volonterski posao u Crvenom križu se većinom svodi na direktno pomaganje tajniku Crvenog križa Jajce u svojim dnevnim aktivnostima kao što je razgovor sa korisnicima Crvenog križa, pisanje izvještaja za kantonalnu upravu itd. U saradnji sa Merhametom Jajce moje obaveze su one koje mi dodjeli predsjednik Merhameta u Jajcu. U te obaveze većinom spadaju podjela paketa sa hranom kada stignu posebne pošiljke, podjela dnevnih obroka korisnicima Javne kuhinje koja se organizuje svakim danom u 11 sati i nabavka namirnica. Želim napomenuti da je moje volontiranje u Merhametu emocionalno najteže iz razloga što se pred taklim brojem ljudi koji su svih nacionalnosti i etniciteta tek u trenucima kada im se pruža pomoći, tj. hrana, shvati koliko zapravo volontiranje znači i koliko volontiranje može da pomogne našim najugroženijim članovima društva. Upravo zahvaljujući tom volontiranju i kontaktu sa takvim ljudima čovjek shvati koliko je zapravo sretan u životu i koliko je važno ljude gledati jednako. Volontiranje u Merhametu je sigurno aktivnost na koju sam najponosniji.

RAM - RUBRIKA AKTIVNIH MLADIH



Volontiranje u Merhametu je sigurno aktivnost na koju sam najponosniji. Smatram da je moralna obaveza nas mladih da pokušamo svima omogućiti da osjete sreću u životu, ako ništa barem na trenutak, makar to bilo kroz jedan upućen osmijeh na ulici.



Odlično znanje njemačkog jezika je Berunu bilo veoma korisno pri volontiranju u Centru za druženje i obrazovanje mladih, gdje je pomagao u organizaciji kursa njemačkog jezika, dok je u sklopu Centra u vrtiću „Ciciban“ držao časove njemačkog jezika, a njegov glavni zadatak je bio da djeci kroz igru približi osnove tog jezika. Udruženju za djecu sa poteškoćama u razvoju "Vodopad Ljubavi" je dvije godine uzastopno na simboličan način pomagao, kreirajući video snimke koji su emitovani na Svjetski dan osoba s Down sindromom.

Pored već nabrojanih mnogobrojnih institucija, Berun je nalazio vrijeme i za dodatna volontiranja, stoga je veoma uspješno obavljao dužnosti vodiča u Muzeju 2. zasjedanja AVNOJ-a. Time je ujedno služio i kao vodič kroz historiju Bosne i Hercegovine, ali i kroz historiju cijele bivše Jugoslavije.

Kao veoma komunikativna osoba uživao sam u prepričavanju naše bogate historije znatiželjnim turistima i pričanjem anegdota o događajima koji su bili važni za moj voljeni grad.

Pored muzeja, volontiranje je uspio ostvariti i na polju bliskom fakultetskom okruženju i to na FIT Coding Challenge godišnjem takmičenju iz programiranja u organizaciji Fakulteta informacijskih tehnologija, gdje je pomagao u organizaciji takmičenja, dočeku predstavnika firmi koje su imale svoje štandove, upućivanju i dočeku takmičara i gostiju te pospremanju nakon završenog takmičenja.

Pored svih fakultetskih i volonterskih obaveza, nalazi vremena i za odmor, kad uživa u čitanju, opušta se uz filmove, serije i igrice te provodi vrijeme u prirodi planinareći i baveći se sportovima poput plivanja i skijanja.

**FIT CODING
CHALLENGE**

Mostar, 03. i 04. Juna 2021.

PRIZNANJE

BERUN AGIC'

Volunter na studentskom takmičenju Coding Challenge na Fakultetu informacijskih tehnologija u Mostaru u suorganizaciji sa Kantonalnim ministarstvom obrazovanja, nauke, kulture i sportsa HNK/MHZ

RAM - RUBRIKA AKTIVNIH MLADIH



Vodeći se poslovicom „Na mladima svijet ostaje“, Berun smatra da je veoma bitno da mladi ljudi budu aktivni, prvenstveno u svojoj lokalnoj zajednici, a zatim i društvu općenito.

Svijet u kojem živimo ostati će prije ili kasnije nama na čuvanje, stoga moramo biti svjesni u kakvom svijetu živimo i kako on izgleda te pomoći te spoznaje jednog dana aktivno oblikovati našu okolinu nabolje. Mladi ljudi većinom imaju neiskvaren i prav moralni kompas te mogu doprinijeti velikim društvenim promjenama upravo radi te neiskvarenosti i novog pogleda na društvene probleme. Na nama samima ostaje da li ćemo imati dovoljno volje i želje da to i ostvarimo.

Fondaciju Hastor navodi kao snažnu motivaciju da aktivno započne sa volontiranjem u institucijama gdje može pomoći ljudima i napraviti pozitivnu promjenu u svojoj zajednici. Kaže kako će Fondacija zauvijek imati njegovu zahvalnost radi toga.

Za kraj, šalje poruku svim stipendistima Fondacije Hastor:

Najbolje oruđe koje ljudi imaju jeste njihovo znanje, stoga se potrudimo da znanje iz dana u dan proširujemo i da s tim znanjem sutra izgradimo bolju budućnost za sve nas.




ZANIMLJIVOSTI



5G mreža

Vjerovatno ste nebrojeno puta čitali o 5G tehnologiji odnosno mreži. Mnogi portali su prenosili razne priče, statističke podatke o ovoj tehnologiji, a da li ste se ikad zapitali šta je zapravo 5G i šta predstavlja? Razvijanjem pametnih telefona i drugih tehnologija koje svakodnevno koristimo razvijale su se i mobilne mreže, a 5G mreža predstavlja petu generaciju mobilnih mreža i trenutno je u fazi testiranja u svijetu. Svaki novi vid ove mreže predstavlja i napredak u tehnologiji, a to nam omogućuje brži pristup internetu i veći broj umreženih korisnika istovremeno.

Prednosti 5G mreže



- 5G mreža bit će brža za čak hiljadu puta od 4G mreže kojom je trenutno pokriven većinski dio naše zemlje.
- Veća efikasnost uređaja, veća pouzdanost mreže te mogućnost spajanja do milion uređaja na kvadratnom kilometru.
- Smanjit će se kašnjenje signala čime će se poboljšati i način gledanja prijenosa uživo.
- Veoma brz internet i stabilna veza bez „pucanja“.

Ovakvom tehnologijom očekuje se poboljšanje životnih okolnosti popraćenih svakodnevnim zastajanjima jer će dolaskom ove mreže infrastruktura bolje funkcionsati, a uz nju i saobraćaj (vozači će imati obavijest o promjeni boje na semaforu te će biti spremniji na reakciju). Ovo sve podrazumijeva veći razvoj umjetne inteligencije što će bitno utjecati na njenu upotrebu u poljoprivredi, zdravstvu, školstvu i drugim sferama ljudskog djelovanja. S obzirom na to da se mnoge oblasti već sada razvijaju u pravcu ove mreže (kao npr. autoindustrija – automobili bez vozača ili samovozeći automobili) njena primjena, prema navodima stručnjaka, bit će neizbjegljiva. Naravno, sve ovo podsjeća na naučnu fantastiku naročito ako uzmemu u obzir strah laičke javnosti koji se širi internetom, što nije odgovor stručnjaka s obzirom na to da se o ovoj mreži još uvijek naučno polemiše i vrše se testiranja.

5G mreža, kako tvrde stručnjaci, trebala bi donijeti višestruke koristi koje trenutna 4G ne može dostići. Pokušajte samo zamisliti grad u kojem se potrošnja toplotne energije automatski mjeri ili pak da automobili međusobno komuniciraju putem senzora pa tako imamo smanjen broj saobraćajnih nesreća. Sve ovo donosi sa sobom 5G mreža, no kad će biti dostupna, ostaje veliko pitanje jer se moraju ispuniti mnogi zahtjevi zbog sigurnosti stanovnika. Ukoliko želite saznati još više, savjetujemo da o ovim pitanjima posjetite službene stranice Evropske unije, gdje se iznose sigurni i provjereni podaci.

BUDIMO KONKURENTNI(JI)!



U 21. stoljeću nije dovoljno imati odličan uspjeh u obrazovnom procesu da bi se osoba učinila atraktivnom na međunarodnom nivou, nivou studija ili zaposlenja. Nerijetko se može vidjeti i čuti da su mladi ljudi koji su skoro diplomirali ili magistrirali nezaposleni, a da su pritom aplicirali i slali svoje biografije (Curriculum Vitae) na mnoge konkurse. Sve manje i manje mlađih zna da pravilno koristi online resurse kojima raspolažu (npr. pravilno korištenje e-maila). Ova rubrika ima za cilj edukacije, seminare, programe razmjena, ali i pokazati na koji to način studenti na međunarodnom nivou rade na vlastitom unapređenju.



Gdje naučiti novi strani jezik online?

Živimo u vremenu kada se skoro i podrazumijeva da jedna mlada osoba poznaje barem jedan strani jezik, najčešće je to engleski koji u Bosni i Hercegovini učimo još od osnovne škole, a zatim i njemački jezik. Ipak, kada poznajete osnove ovih jezika, to vas i ne čini mnogo konkurentnim kada poznavanje stranog jezika podrazumijeva neki od jezika kojeg manje-više svi poznaju. Stoga, odličnu komparativnu prednost možete ostvariti učenjem nekog drugog jezika, a upravo osnove njegovog poznavanja mogu kasnije biti njansa koja će presuditi u vašu korist. U nastavku vam donosimo neke korisne aplikacije za učenje stranog jezika koje možete koristiti i tako dugoročno postati konkurentniji na tržištu rada.

BUDIMO KONKURENTNI(JI)!

Duolingo

Duolingo je među najbolje ocijenjenim aplikacijama za učenje jezika, a to potvrđuje i činjenica da su je i Google Play Store i AppStore proglašili najboljom aplikacijom uopće u 2013. godini. Aplikacija funkcioniše kao igra u kojoj dobijate bodove za svaki tačan odgovor, a postoji i valuta unutar igre, gemovi kojima kupujete dodatke unutar aplikacije.

Korisnici ove aplikacije uče jezik kroz ponavljanje, govorenje i konverzaciju. Lekcije postaju sve teže kako korisnik napreduje, a za razliku od mnogih drugih aplikacija, „Duolingo“ je manje orientiran na gramatiku. Može se učiti samostalno i u timu, a aplikacija je toliko zabavna da lako možete postati ovisni o njoj. Čak i prilikom svake pogreške možete pronaći komentare drugih korisnika koji nerijetko objašnjavaju šta je pravilno i zbog čega u komentarima, a komentare i pitanja za druge možete postaviti i vi.



Memrise

Aplikacija „Memrise“ polazi od prepostavke da je učenje kao užgajanje biljaka. Prvo posadite nove informacije u vaš vrt, potom ih zalijevate i onda pratite kako rastu i postaju dio dugoročnog pamćenja. Aplikacija nudi sjajne maštovite funkcije za učenje koje uključuju mnemotehniku i slike koje mijenjaju oblike kao i kvizove uz koje ćete lakše učiti. Postoje različiti moduli koji ovise o predznanju korisnika, a rječi možete pretraživati po nekoliko različitih funkcija kao što su, naprimjer, najčešće korištene riječi u nekom jeziku.



Busuu


Ono što razlikuje „Busuu“ od ostalih aplikacija za učenje jezika jeste zajednica korisnika koja je u stalnom porastu. Uz to što možete naučiti kako pisati i govoriti jedan od 12 ponudenih jezika, ova aplikacija vas podstiče da slušate i govorite strani jezik kroz interakciju s drugim korisnicima kojima je to maternji jezik. Na ovoj aplikaciji, također, možete pronaći kvizove, različite interaktivne lekcije koje vas dodatno motiviraju, a unutar aplikacije je integriran videochat putem kojega možete komunicirati s ljudima kojima je jezik koji vi odlučite učiti maternji.



BUDIMO KONKURENTNI(JI)!

MindSnacks

„MindSnacks“ korisnicima pruža besplatan i zabavan način da se upoznaju sa stranim jezicima i kulturama. Njegovih jedanaest lekcija je dizajnirano kroz jednostavne igre koje pružaju zabavno i uzbudljivo iskustvo učenja. Svaka lekcija je postavljena kao zadatak za početnike gdje korisnici moraju riješiti niz šarenih puzzli koje su uskladene s njihovim predznanjem. Ukratko: šareno, zanimljivo i vrlo, vrlo smisleno.



Hello Talk

„Hello Talk“ je još jedna aplikacija koja omogućava korisnicima interakciju s izvornim govornicima koji putem aplikacije koja je slična WhatsApp chatu mogu razmjenjivati tekstualne i glasovne poruke. Korisnici mogu ispravljati jedni druge pomoći alata za ispravljanje pogrešaka koji komunikaciju transformiše u lekciju stranog jezika. Aplikacija ima i alat za prevođenje u slučaju da komunikacija na stranom jeziku kreće po zlu kao i korisnu text to voice opciju koja tekst pretvara u glas te na taj način nećete imati nedoumice kako se neka riječ ili fraza na stranom jeziku izgovara.

Nadamo se da ćete neke od ovih aplikacija koristiti u budućnosti te da ćete dugoročno postati bogatiji za poznavanje još jednog jezika.

Pripremila: Una Karabeg




OBJEKTIV



Ajla Imamović



Elma Karić



Azemina Mujanović



Damir Bradarić



Dana Delalić



Alma Čosić



Emina Nukić

PISMO MJESECA

Draga Fondacijo,

danas je zvanično počeo moj doktorski studij i time prestajem biti stipendista. Skoro 5 godina sam bio stipendista. Sve je započelo kada me je direktor srednje škole preporučio Fondaciji i na kraju sam nakon intervjuja bio odabran da budem stipendista Fondacije Hastor. Finansijska pomoć mi je puno značila u tom periodu kada su mi roditelji bili nezaposleni, ali više mi je značila mentorska pomoć, imao sam divnu mentoricu koja možda nije bila stručnjak u polju nauke koju sam želio izučavati, ali njena pomoć mi je puno značila na druge načine. Bila je osoba s kojom sam mogao o svemu pričati i ona bi me saslušala svaku riječ.

Poslije srednje upisao sam Odsjek za informacione tehnologije na Internacionalnom Burch univerzitetu, imao sam stipendiju u obliku popusta na godišnjem iznos školarine, ali opet sam morao platiti određenu svotu novca Univerzitetu. Tu se opet pokazao značaj Fondacije jer sam sa stipendijom Fondacije mogao platiti školarinu i ići na željeni fakultet, a moji roditelji mi ne bi mogli to platiti niti bih im dopustio. Kako sam postao student tako sam isto i ja postao mentor u Fondaciji. Mislio sam da će biti teško, i jeste u nekim trenucima bilo jer sam radio s djetetom s poteškoćama u razvoju, ali opet bilo je užitak raditi s njima. Djeca su uvijek bila zahvalna na pomoći i vidjeti im osmijeh na licu mene je činilo duplo sretnijim. Sada, kada ih vidim u prolazu, uvijek mi mahnu s osmijehom što prepoznajem kao dokaz da sam bio uspješan mentor.

Fondacija me je čak poslala na WeAreDevelopers konferenciju u Beču 2018. godine, što je bilo izvanredno iskustvo gdje sam upoznao dosta ljudi iz svoje struke. Kroz godine u Fondaciji stekao sam i razne prijatelje studente s kojima se i dan-danas čujem i koji su mi mogli u raznim situacijama.

Završio sam dodiplomski studij i nastavio svoj master-studij u Švedskoj na Mälardalen univerzitetu. U isto vrijeme preuzeo sam web-platformu Fondacije i radio s administracijom Fondacije, divne, tople i razumne osobe s kojima mi je bila čast raditi. Završio sam master i ponudili su mi i doktorat na Mälardalen univerzitetu i time opet nastavljam svoju „avanturu“ u Švedskoj.

Tokom svih ovih 5 godina napredovao sam daleko kao osoba i ne bi bio danas ovako uspješan da nije bilo moje mentorice, finansijske pomoći, divne administracije, svega što tala si me kao srednjoškolca i sada puštaš u svijet kao naučnika da ga učinim boljim mjestom. Možda više nisam stipendista, ali ču uvijek biti član familije koja čini Fondaciju i uvijek ču biti tu na raspolaganju.

Hvala još jednom!

Lijep pozdrav,
Aldin Beriša

RAD MJESECA

Moja domovina Bosna i njen pejzaž u meni

Domovino moja, moj najljepši raju,
Ja o tebi pričam u svakome kraju.
Ti si moj ponos, moja si dika,
Za mene u tuđini nema niti jednog poznatog lika.

Sve što jesam i sve što ću nekada biti,
Tebi ću, Bosno, na tome zahvaliti.
Ja te nikada napustiti neću,
Jer u tuđoj zemlji ja ne mogu pronaći sreću.

Hvala ti, jedina moja, što u tebi miran život vodim
I što baščama i livadama tvojim mogu mirno da hodim.
Dragi su mi tvoji i ovi krševi goli,
Svaki dio mene Bosnu voli.

Ti si, Bosno moja, moja majka,
O tebi govori sevdah i skoro pjesma svaka.
Neopisivo si lijepa, lijepa kao san,
Ne bih negdje drugo mogla provesti ni dan.

Masić Alisa

MSŠ „Musa Ćazim Ćatić“ Kladanj



POETSKI KUTAK

Dan kad postat ćemo jedno

Kad u predvečerje vidiš moju sjenu
I kad čuješ da neko te moli
Da još momenat na nebu budeš
I da još malo Zemlju krasиш,
Ne plaći!

Kad u zoru vidiš
Posljednje tragove moga lika
I kad čuješ da neko te moli
Da nebu dođeš što prije
I da i tog dana Zemlju krasиш,
Ne plaći!

Jer jednog dana nebo će prihvatići
I tvoje mane
I moje dobre strane.

Znam,
Taj dan blizu nije,
Ali ne dopusti da ti lice suza mijeh
Jer kad dođe kraj ovog svijeta
Naš početak će tek doći.
Tad zvijezde i sunce
Krasit će noći,
Krasit će dane
I neće biti zvijezde koja padne
Niti sunca koje nakratko kane
Samo jedna Vječnost što spaja
Tebe i mene

Sve do kraja
Kojeg nema
Baš kao ni tog dana o kojem ti pričam.

Ipak zaplači
Jer ti već dugo ne vjeruješ u snove
Koje ja živim
Zato ne vjeruj u dan kad postat ćemo jedno
To je samo još jedno
Sanjanje moje bijedno.

Nedžma Latić



Kontaktirajte nas!

Bulevar Meše Selimovića 16,
Sarajevo
033 774 789
033 774 823
fondacija@hastor.ba



Redakcija

Maida Husnić
Una Karabeg
Nejla Komar
Emra Kula
Nedžma Latić
Fatima Gazić
Aleksandra Đukić
Alek Isaković



Grafički dizajn

Belma Gutlić
Kemil Bekteši
Ada Sivac



Naslovница

Belma Gutlić, "Starke",
tempera